

Utanríkisráðuneytið minnir á að skilafrestur umsókna um styrki til fræðslu- og kynningarverkefna borgarasamtaka er skv. verklagsreglum ráðuneytisins til miðnættis 15. september næstkomandi.

Fræðsluverkefni skulu hafa að leiðarljósi uppbyggingu og eflingu stofnanafærni borgarasamtaka sem vinna að þróunar- og mannúðarmálum.

Kynningarverkefni skulu til þess fallin að auka þekkingu almennings á þróunarmálum og mannúðaraðstoð og aðkomu borgarasamtaka á þeim vettvangi.

Til úthlutunar að þessu sinni er allt að 1,5 m.kr. en hámarksstyrkur vegna hvers verkefnis er hálf milljón króna. Ekki eru veittir styrkir til fjáröflunarverkefna.

Til að teljast styrkhæf þurfa borgarasamtök að uppfylla eftirfarandi skilyrði:

- Vera löglega skráð á Íslandi.
- Vera ekki rekin í hagnaðarskyni.
- Hafa sett sér lög, hafi stjórn og stjórnarformann.
- Hafa lagt fram ársreikninga áritaða annað hvort af opinberri endurskoðunarstofnun, sem er aðili að INTOSAI eða endurskoðunarfyrirtæki, sem starfar skv. alþjóðlegum endurskoðunarstöðlum (IFAC).
- Að félagsmenn eða styrktaraðilar séu minnst 30 talsins.
- Að lýðræði, mannréttindi og jafnrétti séu höfð að leiðarljósi í starfi þeirra.

Umsækjendum er bent á umsóknareyðublað, verklagsreglur utanríkisráðuneytisins um samstarf við borgarasamtök vegna fræðslu- og kynningarmála og aðrar leiðbeiningar á heimasíðu ráðuneytisins (<https://www.stjornarradid.is/verkefni/utanrikismal/throunarsamvinna/borgarasamtok/verklagsreglur-og-umsoknir/>).

Skila skal eftirfarandi fylgigögnum vegna umsókna:

- Útfylltu umsóknarblaði, sem finna má á heimasíðu utanríkisráðuneytisins.
- Ársskýrslu síðasta starfsárs.
- Árituðum ársreikningi síðasta starfsárs.

Jafnframt ber að skila, eða staðfesta að skil hafi áður farið fram á eftirfarandi gögnum:

- Nafnalista yfir skipan stjórnar samtakanna.
- Upplýsingum um löglega skráningu samtakanna.
- Afriti af lögum samtakanna.
- Yfirliti um verkefni og áherslur samtakanna, í hvaða löndum þau starfa og umfang starfseminnar.

Þar sem að reglubundinn umsóknarfrestur er á laugardegi framlengist hann til miðnættis mánudagsins 17. september nk. Umsóknir sendist á netfangið borgarasamtok.styrkir@mfa.is. Gert er ráð fyrir að umsóknum verði svarað skriflega eigi síðar en mánudaginn 29. október 2018.

Umsækjendur skulu lýsa með greinargóðum hætti markmiðum verkefnis, áætlun um framkvæmd og kostnað verkefnis, tímaáætlun þess, auk annarra upplýsinga sem metnar eru nauðsynlegar. Njóti umsækjandi annarra styrkja eða framlaga vegna verkefnisins skal hann gera grein fyrir slíkum framlögum eða styrkjum.

Úthlutun styrkja fer eftir þeim skilmálum sem fram koma í verklagsreglum ráðuneytisins og leiðbeiningum Ríkisendurskoðunar, sem finna má á ofangreindri heimasíðu.

Umsóknir sem ekki uppfylla skilyrði auglýsingar og úthlutunarskilmála verða ekki teknar til greina.

Um styrkveitingar til verkefna borgarasamtaka í málaflokknum gilda lög um opinber fjármál, nr. 123/2015 og reglugerð nr. 642/2018 um styrkveitingar ráðherra.